



**«ԻՆՏԵՐԱԿՏԻՎ ԿՐԹՈՒԹՅԱՆ ԶԱՐԳԱՑՈՒՄ»
ՀԻՄՆԱԴՐԱՄ**



**ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ
ԴԱՍԸՆԹԱՑ 2022**

ՀԵՏԱԶՈՏԱԿԱՆ ԱՇԽԱՏԱՆՔ

ԹԵՄԱ

**Սովորողների մեջ ընթերցանության խթանումն ու
զարգացումը տարրական դասարաններում**

ԱՌԱՐԿԱ

Դասվար

ՀԵՂԻՆԱԿ

Լիանա Հարությունյան

ՄԱՐԶ

Կոտայք

ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆ

Հրազդանի Պ. Սևակի անվ. № 8 հիմն. դպրոց

ԲՈՎԱՆԴԱԿՈՒԹՅՈՒՆ

Ներածություն.....	3
Կարդալու կարողության ձևավորման մեթոդներն ու դրանց իրագործման եղանակները մայրենիի դասավանդման ժամանակ.....	4
Ընթերցողական կարողությունների զարգացումը տարրական դասարաններում.....	8
Ընթերցանությունը որպես բառապաշարի հարստացման միջոց.....	11
Ընթերցանությունը մտքի համար նույնն է, ինչ ֆիզիկական վարժությունը՝ մարմնի.....	14
Եզրակացություն.....	16
Օգտագործված գրականություն և հղումներ.....	17

ՆԵՐԱԾՈՒԹՅՈՒՆ

Ընթերցանությունը խորացնում է մտածողությունը, միտքը մղում դեպի որոնումներ և երևույթների վերլուծություն:

Մ. Բ. Կալինին

Կան երեխաներ, որ ծնված օրվանից գրքի սիրահար են: Նրանք կարող են ժամերով զբաղվել ընթերցանությամբ, ցեցի նման մտնել գրքերի մեջ ու դուրս չգալ:

Բայց, շատերը գիրք կարդալ չեն սիրում, հատկապես հեռուստացույցով ու համակարգչային խաղերով լի մեր առօրյայում: Իսկ ի՞նչ անել այդ դեպքում: Ի՞նչ անել, եթե երեխան դժվարությամբ և/կամ դժկամությամբ է գիրք կարդում: Առհասարակ ինչի՞ համար է պետք գիրք կարդալ, այն էլ թվայնացման մեր դարաշրջանում:

Այս դարում մարդիկ օգտվում են համակարգչից ավելի շատ, քան գրքերից: Սակայն համակարգչով գիրք կարդալը աչքերին, նյարդային համակարգի, մարդու մկանների վրա բացասական ազդեցություն է թողնում: Այս ամենից, սակայն, **երբեք չի դադարում գրքի տպագրությունը**, քանզի երբեք համակարգիչը չի կարող լրացնել գրքի տեղը. **գիրքը միշտ էլ մնում է անփոխարինելի:**

Ընթերցանությունը կարևոր նշանակություն ունի մարդու համար: Այն ոչ միայն օգնում է, որպեսզի դառնանք խելացի, այլ կարող է նաև բարելավել ուղեղի աշխատանքը:

Մեր նպատակն է զարգացնել կրտսեր դպրոցականների կարդալու, վերարտադրելու կարողությունները, ճանաչողական և լեզվական գիտելիքները, կատարելագործել նրանց հարուստ խոսքի ու բառապաշարի կիրառական հմտությունները, ձևավորել արժեքների համակարգ:

Այդ ամենին հասնելու համար անհրաժեշտ է, դեռևս առաջին դասարանից, մշակել և կիրառել այնպիսի մեթոդներ ու հնարներ, որոնք կօգնեն հետագայում ունենալ խելացի ու զարգացած քաղաքացիներ:

**Կարդալու կարողության ձևավորման մեթոդներն ու դրանց
իրագործման եղանակները մայրենիի
դասավանդման ժամանակ**

Կրտսեր դպրոցում մայրենիի դասընթացի կարևոր բաղադրիչներից է ընթերցանությունը, որի նպատակն է զարգացնել կրտսեր դպրոցականների կարդալու, վերարտադրելու կարողությունները: Սովորողների կարդալու տեխնիկայի զարգացմանը զուգընթաց անհրաժեշտ է նաև արտահայտիչ խոսքի և կարդալու կարողություններ մշակել դեռևս գրաճանաչության այբբենական շրջանում: Այդ աշխատանքը պետք է սկսել՝ աշակերտներին ծանոթացնելով խոսքի տեխնիկայի բաղադրիչներին՝ շնչառություն, ձայն, հնչերանգ, առոգանություն: Հատուկ շնչառական վարժությունների միջոցով աշակերտներին առաջին հերթին պետք է սովորեցնել ճիշտ շնչել: Կարելի է կատարել առոգանությունը զարգացնող վարժանքներ:

Մեթոդիկայում մշակված են աշակերտների հնչյունային լսողությունը և առոգանությունը զարգացնող շատ վարժություններ: Այսպես՝

ա. կարդալ մտքում

բ. արտասանել շշուկով, դանդաղ, ցածրաձայն, կամաց, բարձրաձայն և արագ:

Նախադասության մասին տարրական գիտելիքների ուսումնասիրման ժամանակ անհրաժեշտ է երեխաների ուշադրությունը հրավիրել հարցական, բացականչական, հրամայական, պատմողական նախադասությունների արտասանության ելևէջների վրա և սովորեցնել գործնականորեն տարբերել դրանց ընթերցման առանձնահատկությունները:

Պրոֆեսոր Ա. Ե. Տեր-Գրիգորյանը տեղին է նկատել. *«Արտահայտչականությունը լավ կարդալու հիմնական ու իր կատարելությամբ ամենաբարձր առանձնահատկությունն է, առանց դրա կարդալը կատարյալ համարվել չի կարող»:*

Մշակելով երեխայի արտահայտիչ ընթերցանությունը՝ նրան հավաստիացնում ենք, որ գեղեցիկ ընթերցելն արվեստ է՝ ինչպես գեղեցիկ երգը, որը հիացնում է մարդկանց և լսվում հաճույքով: Այն ձևավորում է գրական ճաշակ, բարձրացնում լեզվական մշակույթը, ազդում սրտի և զգացմունքների վրա, նպաստում մտածողության զարգացմանը, հարստացնում գիտելիքները:

Ինչպես ասել է Ղ. Աղայանը. «...Յուրաքանչյուր շեշտ և կետ զանգակի պես հնչում է երեխայի ականջին, հոգեբույս երգի նման թափանցում է մարդկային հոգու խորքերը, թրթռացնում բոլոր նուրբ լարերը նրա մոտ »:

Ճիշտ է նկատել մեծ մանկավարժը, քանի որ տարրական դասարաններում արտահայտիչ կարդալ սովորեցնելու հիմքում ընկած է առաջին հերթին հայերենի կետադրական նշանների ըմբռնումը և ընթերցանության գիտակցականությունը: Աշակերտը պետք է զգա առոգանության ու տրոհության նշաններին առնչվող դադարների ու հնչերանգի, ինչպես նաև բնագրի բովանդակությունից բխող տեմպի ու ձայնի ելևէջների փոփոխությունը:

Կան մի շարք հնարներ, որոնք նպաստում են խորությամբ ըմբռնել ընթերցածը.

ա. դիտարկել և մեկնաբանել ստեղծագործության վերնագիրը,

բ. առանձնացնել հենակետային (բանալի) բառերն ու արտահայտությունները,

գ. վերլուծել բնագիրն ու պարզաբանել հիմնական գաղափարը, ենթատեքստը և այլն:

Աշակերտների՝ արտահայտիչ ընթերցելու կարողության ձևավորմանը մեծապես նպաստում են ուսուցչի կամ աշակերտների կարդալու եղանակների վերլուծությունները, որոնք կարելի է կատարել հետևյալ հաջորդականությամբ.

ա. Կարդալ ստեղծագործությունը՝ ուշադրություն հրավիրելով ընտրված ստեղծագործությանը վերաբերող յուրաքանչյուր մանրուքի:

բ. Որոշել ստեղծագործության ենթատեքստը. ի՞նչ է հեղինակը կամեցել հասկացնել ընթերցողին:

գ. Տարբերել արձակի և չափածոյի ընթերցման յուրահատկությունները: ՏՏՏ տեսալսողական սարքերի միջոցով ունկնդրել հեքիաթ և բանաստեղծություն ու համեմատել դրանք:

դ. Մտքում ընթերցելով՝ առանձնացնել այն գլխավոր հատվածները, որոնք հատկապես հուզել են, հետաքրքրել և զգացմունքներ առաջացրել:

ե. Կատարել արտասանական վերլուծություն՝ ո՞ր տողը ինչպե՞ս պետք է ընթերցել (ձայնի ինչպիսի՞ բարձրությամբ, ի՞նչ շեշտադրումներով և այլն):

Ուսումնասիրությունները, ցույց են տվել, որ այս ամենի արդյունքում ատիճանաբար ձևավորվում է երեխաների արտահայտիչ կարդալու հմտությունը, նրանք սովորում են առավել վարժ, սահուն, արտահայտիչ ու հասկանալով կարդալ բնագիրը:

Դերերով և խմբովին կարդալը ևս մեծապես նպաստում է կրտսեր դպրոցականների արտահայտիչ կարդալու կարողության զարգամանը, քանի որ այդ դեպքում նրանք գիտակցում են հերոսների խոսքը, հնչերանգը, ձայնի փոփոխությունները և, ըստ այդմ էլ, ընտրում են կարդալու ճիշտ ձևն ու եղանակը:

Արտահայտիչ ընթերցանության կարողության ձևավորումը նպատակահարմար է իրականացնել և՛ հատուկ, և՛ հարակից վարժությունների միջոցով: Հատուկ վարժությունները կատարվում են անմիջապես մայրենիի դասերին՝ նպատակաուղղելով հենց արտահայտիչ ընթերցելու կարողությունների զարգացմանը, իսկ հարակից վարժությունները անցկացվում են լեզվական որևէ նյութ բացատրելու ընթացքում, երբ ուսուցիչը միևնույն ժամանակ երեխաներին հանձնարարում է բարձրաձայն ընթերցել նախադասությունը՝ պարզ, հստակ և արտահայտիչ: Տվյալ դասի համար այդ թեման հիմնականը չէ, բայց ուսուցիչը, օգտվելով իրավիճակից, բնագրի ընթերցմանը զուգընթաց հիշեցնում է արտահայտիչ խոսքի պահանջները: Արտահայտիչ կարդալու կարողության զարգացման հատուկ վարժանքներից է **տրամադրության բառարանը, նկարի բառային նկարումը, մրցակցային ընթերցանությունը:**

Տրամադրության բառարան: Գրում են ընթերցվող բնագրի «ուրախ», «տխուր», «երջանիկ», «ոգևորված», «մեղմ» բառերը, վերլուծում են նյութը և եզրակացնում, թե հեղինակն ինչ զգացմունքներով ու հույզերով է գրել տվյալ ստեղծագործությունը: Այնուհետև ընթերցելիս ձգտում են արտահայտել այդ տրամադրությունները:


Նկարի բառային նկարում: Այս վարժությունն անվանում են «բառային նկարչություն»: Աշակերտները փորձում են բառերով նկարագրել պատկերվող իրադարձությունը, գործող անձերին, առանձնացնում են ստեղծագործության մի հատված՝ գույներով ներկայացնելու համար: Այս նկարչություն-վարժությունը զարգացնում է նաև կրտսեր դպրոցականների երևակայությունը:

Մրցակցային ընթերցանությանն ու արտահայտիչ ընթերցելուն նախապատրաստվելիս սովորողը պետք է հետևի հետևյալ քայլաշարին.

- կարդալ և երևակայությամբ պատկերացնել ընթերցվող բնագիրը,
- որոշակի վերաբերմունք դրսևորել նկարագրվող դեպքերի նկատմամբ,
- որոշել կարևոր մտքերն ու ասելիքն ամբողջացնող տողերը,
- ընտրել արտահայտչամիջոցները, տրամաբանական շեշտերի տեղը, նշել դադարները, տեմպը և այլն,

- անպայման նկատի ունենալ, որ բնագիրն ընթերցում է ունկնդիրների համար:

Նմանատիպ վարժությունները զարգացնում են երեխաների արտահայտիչ կարողալու գործնական հմտությունները: Նրանք փորձում են արտահայտել իրենց տպավորությունները, մտքերը, հուզմունքները՝ ձեռք բերելով գեղեցիկ ու տպավորիչ խոսք կառուցելու կարողություն:



Ընթերցողական կարողությունների զարգացումը տարրական դասարաններում

Եթե սովորողի մոտ ձևավորված է կարդալու կարողությունը, ապա ընթերցած բնագրի շուրջ տարվող մեթոդապես ճիշտ աշխատանքի շնորհիվ ընթերցանությունը դառնում է նաև անձի բազմակողմանի զարգացման միջոց:

Անառարկելի է, որ ընթերցանությունը գիտելիքների ձեռք բերման, բազմակողմանի զարգացման, բառապաշարի հարստացման հիմնական աղբյուր է: Կարդալու միջոցով հարստանում ու զարգանում են աշակերտների երևակայությունը, հոգեկան ներաշխարհը, խոսքը, ճաշակը: Հենց այս է պատճառը, որ մանկավարժներն ու մեթոդիստներն ամեն ինչ անում են սերունդների մեջ ընթերցողական կարողությունների մշակման, ընթերցասիրության դաստիարակության համար: Այս կարևոր խնդրի լուծման ճանապարհին հիմնականը կարդալու հմտությունների զարգացումն է:

Որպեսզի երեխան սիրի գիրքը և կարդա, պետք է ուսուցիչը լավ կարդալ սովորեցնի աշակերտներին ու օգնի նրանց հաղթահարելու կարդալու ընթացքում առաջացած դժվարությունները:

Ա. Ղարիբյանը ժամանակին ասել է. *«Բացատրական ընթերցանության հիմնական նպատակներից է կարդալ սովորեցնելը, որովհետև կարդալու ուսուցումը լեզվի ուսուցման ամենահիմնական ու պատասխանատու բաժինն է: Թե՛ լեզվի մյուս բաժինների և թե՛ միջնակարգի բոլոր այլ առարկաների յուրացումն ապահովում է աշակերտի կարդալու հմտությամբ: Անհնարին է ծանոթանալ որևէ գիտության հիմունքներին, առավել ևս դառնալ ժամանակակից կուլտուրայի պահանջների բարձրության վրա կանգնած մարդ, եթե կարդալ չգիտես: Կարդալու ուսուցման որակից է կախված մյուս առարկաների ուսուցման հաջողությունը, իսկ կարդալու հմտության հիմնական որակը որոշվում է կարդալու ուսուցմամբ տարրական դասարաններում»:*

Կրտսեր դպրոցականի ընթերցողական կարողությունների զարգացումը նպաստում է ուսուցման արդյունավետության բարձրացմանը: Ճիշտ, սահուն, հասկանալով, արտահայտիչ կարդացող աշակերտներն ավելի լավ են սովորում ցանկացած առարկա, քան կցկտուր

կարդացողները: Բանն այն է, որ վատ կարդացողն ընթերցելիս իր ուշադրությունը հիմնականում կենտրոնացնում է կարդալու գործողությանը և չի ըմբռնում կարդացածի բովանդակությունը, հիմնական միտքը և այլն: Լավ կարդացողն արագ է ըմբռնում, հասկանում բնագիրը, որովհետև նա ժամանակ չի ծախսում կարդալու գործողության վրա:

Ընթերցանության նկատմամբ հետաքրքրասիրությունն աշակերտների մեջ պետք է առաջացնել դեռևս առաջին դասարանից: Այդ իսկ պատճառով այբբենարանն ավարտելուց հետո անգամ պետք է փոքրերի համար կարդալ հետաքրքիր հեքիաթներ և իրենց նույնպես դրդել դրանք կարդալ, հետաքրքրությունն առաջացնել կարդալու նկատմամբ:

Գրաձանաչության ուսուցման շրջանում ձևավորվում է կարդալու նախնական կարողությունը:

Աշակերտն առաջին հերթին պետք է հոգեբանորեն պատրաստ լինի և իր մեջ ձևավորի այն համոզմունքը, որ ինքը նոր նյութը՝ հեշտ թե դժվար, կարող է կարդալ: Ըստ Ջ. Գյուլամիրյանի՝ *«Աշակերտը կարդալ սովորում է ոչ թե նույն նյութը բազմակի ընթերցելով, այլ անձանոթ նյութերի անընդհատ ընթերցմամբ»:*

Այժմ մշակվել են ոչ ավանդական ժամանակակից բազմաթիվ մեթոդներ և հնարներ, որոնց միջոցով աշակերտներն ավելի հաճախ են ընթերցում ինքնուրույն կամ խմբովի: Սրանք նպաստում են կարդալու գործընթացի արդյունավետությանը: Այդ մեթոդների անտեղի օգտագործումը կխոչընդոտի ուսուցման գործընթացի հաջող իրականացմանը: Իսկ որոշ մեթոդների կիրառումը դժվար կլինի, եթե աշակերտները լավ չտիրապետեն լավ կարդալու տեխնիկային, օրինակ՝ «Խճանկար» մեթոդը: Նախ աշակերտն առաջին խմբում պարտավոր է սովորել նոր նյութը, ապա սովորեցնել մյուս խմբի ընկերներին: Եթե նա ընթերցողական հմտություններ չունի, ապա չի կարողանա կատարել տվյալ հանձնարարությունը:

Մանկավարժական պրակտիկայում կիրառվում են կարդալու կարողությունը զարգացնող մեթոդներ: Արդյունավետ է «Փոխգործուն գրառումների համակարգ», «Քառաբաժան», «Կրկնակի գրառումներով օրագիր», «Մտածի՛ր-գուգորդի՛ր-մտքե՛ր փոխանակիր» և այլն:

Կարդալու կարողությունների զարգացման լավագույն միջոց է ինքնուրույն ընթերցանությունը: Որպես միջոց՝ արդյունավետ է արտադասարանային ընթերցանության ճիշտ կազմակերպումը: Այդ աշխատանքը հարկավոր է այնպես կազմակերպել, որ երեխան հայտնվի

գրքերի կախարդական աշխարհում և կապվի գրքին: Կարդացած նյութը պետք է լինի զարմանալի, հրաշալի, հեքիաթային, որպեսզի գիրքը դառնա երեխայի «լավագույն ուղեկիցն ու բարեկամը»:

Ինքնուրույն ընթերցանություն կազմակերպելիս որպես հնար կարելի է օգտագործել բարձրաձայն կարդալը (երեխաների համար զվարճալի կարող է լինել, երբ նրանց առաջարկվի ձայնագրել սեփական խոսքը բարձրաձայն կարդալիս, ինչը հնարավորություն կտա լսելու և գնահատելու սեփական խոսքը, բարելավելու դրա արտահայտչականությունը): Ամենակարևոր գործոններից է հասկանալով կարդալը: **Այս դեպքում կարդալը դառնում է ոչ թե նպատակ, այլ միջոց: Նպատակը դառնում է ընկալումը, իսկ կարդալը՝ պայման:**



Ընթերցանությունը որպես բառապաշարի հարստացման միջոց

Աշակերտների բանավոր ու գրավոր խոսքի զարգացման հիմքերը դրվում են տարրական դասարաններում: Մարդն իր ողջ կյանքի ընթացքում շփվում է իր նմանների հետ, խոսում, գրուցում, որևէ լուր հաղորդում, վիճում և այդ բոլորը՝ խոսքի միջոցով: Բնականաբար, որքան բարձր է մարդու խոսքի մշակույթը, որքան նա հստակ ու ճիշտ է արտահայտում իր մտքերը, հաղորդակցվում շրջապատի հետ, այնքան բովանդակալից է նրա խոսքը, հաճելի է նրան լսելը:

Խոսքի զարգացման ուղղությամբ տարվող աշխատանքներն անհնար է պատկերացնել առանց ընթերցանության, քանի որ ընթերցանությունը մտածողության և մտավոր զարգացման ակունքներից մեկն է:

Կարդալը մարդու հոգեկան և մտավոր աշխարհի հարստացման ու զարգացման ամենաարդյունավետ միջոցն է: Դժբախտաբար, այսօր մեր սերունդը քիչ է կարդում. մասնավորապես կրտսեր դպրոցականի համար կարդալու հիմնական միջոցը դասագիրքն է: Տարբեր պատճառներով (սոցիալական, հոգեբանական, մանկավարժական) այդ տարիքի երեխաները կարդում են (չնչին բացառությամբ) միայն դասագրքերում զետեղված ստեղծագործությունները:

Մինչդեռ շատ կարևոր դեր ունի նաև արտադասարանական ընթերցանությունը, որի միջոցով կարող ենք սեր արթնացնել գեղարվեստական գրականության նկատմամբ, բազմաբնույթ դաստիարակչական աշխատանք կատարել աշակերտների բնավորության ու վարքի ձևավորման ուղղությամբ: Այն նպաստում է նաև երեխաների աշխարհաճանաչմանը, մտահորիզոնի զարգացմանը, հետաքրքրությունների բավարարմանը:

Աշակերտների բառապաշարի հարստացման աշխատանքները կատարվում են ընթերցանության դասի բոլոր փուլերում՝ և՛ նոր նյութ հաղորդելիս՝ ակտիվ երկկողմյան զրույցների միջոցով, և՛ ընթերցելիս ու պատմելիս, և՛ բառային աշխատանքի ու բնագրերի վերլուծության ժամանակ:

Նոր նյութի հաղորդման ժամանակ, մինչև բնագրի առաջին ընթերցումը, ուսուցիչն անցկացնում է **ակտիվ երկկողմանի հարցազրույց**, որպեսզի երեխաների հոգում

համապատասխան հույզեր ու զգացմունքներ առաջանան, նրանք ընկալեն ստեղծագործության բովանդակությունն ու կերպարները:

Նոր նյութի հաղորդման հաջորդ փուլը բնագրի ընթերցումն է նախ ուսուցչի, ապա՝ աշակերտների կողմից: Այն շատ կարևոր նշանակություն ունի ինչպես կարդալու հմտությունների մշակման, նյութի բովանդակության ընկալման, այնպես էլ բնագրի լեզվարտահայտչական միջոցների խոր ու բազմակողմանի զարգացման համար:


Կրտսեր դպրոցականների տարիքային առանձնահատկություններից է ընդօրինակումը: Այդ տարիքի երեխաների համար իրենց ուսուցիչն ամենակարողն է, և նրա թե՛ խոսքը, թե՛ ձայնը, թե՛ շարժումն ու դիմախաղերը կրկնօրինակման աղբյուր են, ուստի ուսուցչի խոսքը շատ կարևոր է կրտսեր դպրոցականների խոսքային կարողությունների ձևավորման գործընթացում: Նշանակում է՝ նախքան առաջին բառը կարդալը երեխան պիտի լսի ուսուցչի, ծնողի ընթերցանությունը, որպեսզի զգա գեղարվեստական պատկերների գեղեցկությունը, «տեսնի» շրջապատող աշխարհն իր ողջ հմայքով: Ուստի պետք է հետամուտ լինել, որ առաջին դասարանից սկսած՝ ընթերցանությունը դառնա երեխայի համար հոգևոր պահանջմունք: Այս նպատակին հասնելու համար անհրաժեշտ է լուծել մի շարք խնդիրներ.

1. Կարդալու կարողությունների ու հմտությունների զարգացում. հասնել նրան, որ տարրական դպրոցն ավարտող երեխան կարողանա կարդալ վարժ, սահուն, գիտակցորեն ու արտահայտիչ:
2. Բանավոր ու գրավոր խոսքի զարգացում. երեխան կարողանա պարզ, անկաշկանդ, գեղեցիկ բառապաշարով արտահայտել իր մտքերը, հաղորդակցվել շրջապատի մարդկանց հետ:
3. Կարդալու և խոսելու մշակույթի ձևավորում, ուրիշներին լսելու և ճիշտ ու փաստարկված պատասխանելու կարողության զարգացում:
4. Աշակերտի երևակայությունը, ստեղծագործական ու մտավոր ունակությունները խթանող լեզվական միջոցների գործադրում:
5. Ուսումնասիրել այնպիսի նյութեր, որոնք ոչ միայն ընդարձակեն սովորողների ճանաչողության սահմանները, այլև սեր ու հետաքրքրություն առաջացնեն գեղարվեստական գրականության, մասնավորապես՝ ընթերցանության նկատմամբ, նպաստեն աշակերտի հոգևոր, մտավոր ու բարոյական առաջընթացին:

Ամեն մի վերընթերցման ժամանակ ուսուցիչը պետք է բացահայտի մի նոր բան, այնպիսի մանրամասներ, որ առաջին, երկրորդ ընթերցումների ժամանակ չեն նկատել երեխաները, նրանց ուշադրությունը հրավիրի գեղարվեստական պատկերների, կերպարների բնութագրումների, գործող անձերի, լեզվի, ոճի, դաստիարակչական ու ճանաչողական հարցերի վրա:

Տարրական դասարաններում գործադրվում են մեթոդիկայում ընդունված կարդալու շատ ձևեր՝ բարձրաձայն, լուռ, դերերով, խմբովին և այլն: Կարդալու կարողությունների մշակման համար ամենաարդյունավետը ձայնով կամ բարձրաձայն կարդալն է, երբ աշակերտը լսում է իր ձայնը, և ավելի լավ են մշակվում կարդալու հմտություններ, մասնավորապես արտահայտչականություն:

Կարդալով՝ երեխաները ծանոթանում են գեղարվեստական գրականության ընտիր նմուշներին, լսում են գրական լեզուն, որն ընդլայնում ու ակտիվացնում է նրանց բատապաշարը, օգնում սեփական դատողություններն արտահայտելու համար անհրաժեշտ բառեր ընտրել և օգտագործել խոսքում:



Ընթերցանությունը մտքի համար նույնն է,ինչ ֆիզիկական վարժությունը՝ մարմնի

Ինչպես նշում է անգլիացի պոետ Ադիսոնը. «Ընթերցանությունը մտքի համար նույնն է,ինչ ֆիզիկական վարժությունը՝ մարմնի»: Իսկ ահա հանճարեղ Չարենցը գրքերի աշխարհը անեզր տիեզերքի է նմանեցնում՝ ձոնելով գրքերի հատուկ տաղ: Մարդկության պատմության մեջ չկա մի հանճար, ով բացառի ընթերցանության ու գրքի կարևորությունը:

Վազքը բարելավում է սիրտ-անոթային համակարգի աշխատանքը, պարբերաբար ընթերցանությունը բարելավում է հիշողությունը՝ մարզելով ուղեղը: Տարիքի հետ հիշողությունն ու ուղեղի աշխատանքը թերանում են, սակայն ընթերցանությունը օգնում է դանդաղեցնել այդ գործընթացը՝ ավելի սթափ պահելով միտքը: Ուղեղի հաճախակի վարժանքները կարող են իջեցնել ուղեղի ծերացումը շուրջ 32 տոկոսով:

Չնայած նրան, որ ավելի ու ավելի շատ մարդիկ ձեռք են բերում էլեկտրոնային գրքեր՝ արժե հուսալ, որ տպագիր գրքերը չեն պատրաստվում վերանալ: Մարդիկ, ովքեր կարդում են էլեկտրոնային գրքեր, այնուամենայնիվ դեռ շարունակում են կարդալ նաև տպագիր: Եվ չնայած մենք բոլորս կողմնակից ենք թվային հարմարավետությանը, սակայն չենք կարող մեզ գրկել հին տպագիր գրքեր կարդալու հաճույքից:

Չկա ավելի լավ բան, քան հին գրքերի հոտը կամ նորի հիմքի ճեղքվածքը. գումարած՝ երբեք չի լինի մարտկոցների հետ կապված խնդիր: Եվ ստացվում է, որ այս ամենը օգտակար է նաև առողջության և երջանկության համար:

Ընթերցանությունը քնելուց առաջ կարող է օգնել՝ ավելի լավ քնել: Այն դարձնելով սովորություն՝ մեր ուղեղին ազդանշան ենք տալիս, որ ժամանակն է գնալ քնելու: Գրքի ընթերցանությունը ավելի շատ է հանգստացնում, քան քնից առաջ էկրանին նայելը: Պլանշետների և էլեկտրոնային գրքերի էկրանները, ըստ էության, մեզ պահում են արթուն ավելի երկար և նույնիսկ վնասում մեր քունը: Դա վերաբերում է նաև երեխաներին:

Ծնողները ցանկանում են, որ իրենց երեխաները ավելի շատ կարդան հաճույքի համար, և նրանք, ովքեր ցանկանում են խրախուսել իրենց երեխաներին դառնալ գրքասեր, կարող են սկսել

տանը բարձրաձայն կարդալուց: Օրինակ բարձրաձայն կարդալը երեխաներին փոքր տարիքից կարող է ոգեշնչել՝ դառնալ հաճախակի ընթերցող, կամ երեխա, ով կարդում է շաբաթը հինգից յոթ օր ուղղակի հաճույքի համար: Մա լավ ձև է այն հոբբի դարձնելու համար: Մանկական գրքերը երեխաների բառապաշարը ավելացնում են ավելի քան 50 տոկոսով, ի տարբերություն հեռուստատեսության:

Մեծերի ասույթներից.

▶ *Լավ գիրքն այն գիրքն է, որ գրել է լավ մարդը:*

Վիլյամ Սարոյան

▶ *Կյանքը պետք է լցված լինի գրքերով, որոնք լի են կյանքով:*

Մարկ Ավրելի

▶ *Գրքերն ապահով ու սառը բարեկամներ են:*

Վիկտոր Հյուգո

▶ *Գիրքը պետք է կարդալ մատիտը կամ գրիչը ձեռքին: Ոչ մի բան այնպես չի ձևավորում ճաշակն ու դատողությունների ճշտությունը, ինչպես դուր եկած հատվածն արտագրելու կամ խորիմաստ միտքը նշելու սովորությունը:*

Անդրե Մորուա



ԵԶՐԱԿԱՑՈՒԹՅՈՒՆ

«Առանց ընթերցանության չկա իսկական կրթություն, չկա և չի կարող լինել ո՛չ ճաշակ, ո՛չ խոսք, ո՛չ բազմակողմանի լավ ըմբռնում...»:

Ալեքսանդր Գերգեն

Ինչպես արդեն նշել եմ՝ գիրք կարդալը կարելի է համեմատել սպորտով զբաղվելու հետ: Ինչպես մարզվելիս մկաններն անընդհատ աշխատում են և ավելի են ուժեղանում, այնպես էլ գիրք կարդալիս մարզվում է ուղեղը՝ հիշողությունը, երևակայությունը, մտածողությունը:

Այսօր շատերը կարծում են, թե գովելի է այն փաստը, որ իրենց 2 տարեկան երեխան կարողանում է օգտվել համակարգչից: Հենց այդ նույն ծնողները վտանգում են իրենց երեխաների առողջությունը և ապագան: Այսօր երեխաները չունեն մանկություն, բակում չկա խինդ ու ծիծաղ, չկան խաղեր: Բոլորը փակված իրենց սենյակներում կուրանում և կուզիկանում են: Պետք է գի՛րք կարդալ:

Գիրքն ու համակարգիչը ոչ թե պետք է հակադրվեն, այլ իրար լրացնեն: Համակարգիչը ավելի շատ տեղեկատվական գիտելիքներ է պարունակում իր մեջ, ցանկացած նորություն կարելի է շատ արագ գտնել համացանցից: Մակայն շատ ավելի հաճելի է կարդալ գրքից: Գիրքն անփոխարինելի հաճույք է:

Հետազոտությունները ցույց են տալիս, որ ինչքան շատ են երեխաները կարդում, այնքան նրանց բառապաշարը հարստանում է, և դրան զուգահեռ զարգանում են նրանց կոգնիտիվ (իմացական) կարողությունները: Վաղ տարիքում կարդալու հմտությունները կապված են հետագայում բարձր ինտելեկտի հետ: Կարդալը նպաստում է ուրիշների մտավոր աշխարհը ավելի լավ հասկանալուն, ընթերցանությունը նաև լիցքաթափում է սթրեսից:

Երեխաների համար պետք է կարդալ գրքեր շատ փոքր տարիքից, նույնիսկ դեռ չծնված ժամանակ: Որքան փոքր ժամանակից նրանք առնչվեն ընթերցանության հետ, այնքան հետագայում ավելի հեշտ և հաճույքով կզբաղվեն գիրք կարդալով:

Այսպիսով, **խթանելով և զարգացնելով ընթերցանությունը, կունենանք գրագետ, բանիմաց, ինտելիգենտ և բազմակողմանի զարգացած քաղաքացիներ**, որոնց կարիքը մեր երկիրը շատ ունի:

ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ ԵՎ ՀՂՈՒՄՆԵՐ

Խարազյան Ռոզա Փաշիկի «Աշակերտների բառապաշարի հարստացումը տարրական դասարաններում», Երևան-2003

«Նախաշավիդ» գիտամեթոդական հանդես 1.2013, Երևան-2013

«Նախաշավիդ» գիտամեթոդական հանդես 6.2015, Երևան-2015

<https://hy.wikipedia.org/wiki/>

<https://www.poqrikishkhan.am/>

<https://forum.armedu.am/forum/>

<https://multiurok.ru/files/>

<https://mediamax.am/>

